

**Naaja H. Nathanielsen
Attaviitsoq**

**UPA 2016/89
26. maj 2016**

Inuiaqatigiinni naligiinnerulernissaq pillugu inuiaqatigiittut naleqartitat suut tunngavigalugit Nunatta ineriartortinnissaanik Inatsisartuni oqallisissiatut siunnersuut.

(Inatsisartunut ilaasortaq Sara Olsvig, Inuit Ataqatigiit)

Naligiinneq assigiissuserlu assigiinngillat. Naligiissagutta assigiittariaqanngilagut. Assigiinngitsorujussuusinnaavugut: isummagut assigiinngissinnaapput, assigiinngitsunik soqutigisaqarsinnaavugut assigiinngitsunillu tunuliaqutaqarsinnaalluta. Kisianni qanorluunniit assigiinngitsigaluarutta assigiimmik naleqartutut isigineqartariaqarpugut inuiaqatigiinnilu iluaqtissanut assigiimmik atuisinnaasariaqarluta. Assigiinngissitaarneq inuiaqatigiinni innuttaasut akornganni naligiinnermik kissaateqartuni tunngaviusumik naleqartitaassaaq. Inuiaqatigiit assigiinnik innuttaqarlutillu suut tamaasa pillugit assigiinnik isumallit inuiaqatigiittut nikingasorujussuurtulli amiilaaritigaakka.

Naleqartitat Inuit Ataqatigiit ineriartornissatsinni aqutsisuusussatut siunnersuutaat. Kikkut tamarmik ilinniagaqarsinnaanissaannik pisariaqartitsineq immikkut ittumik erseqqissarusuppara. Ilinniartitaaneq naligiinnerulernermut aqquasaarpoq. Innuttaasut ilinniarsimasut suliffissaaleqinngillat. Suliffeqarnermullu attuumassuteqarneq toqqissisitsillunilu isumannaassutsimik tunisisarpoq. Apeqqut tassaavoq, qanoq isilluta tamakku angussanerigut. Ataatsimoorluta takusinnaavarput meerarpassuit meeqqat atuarfianni atuartinneqarnissaminnik pisariaqartitaminnik atuartinneqarneq ajortut. Taamaattumik naleqartitat kisiisa eqqartussallugit naammangilaq. Allangornerit piviusut piusariaqarput. Meeqqat atuarfianni allangoriartornermik suliaqarneq aallartilaalerpoq – taamatullu suliaqarnerup politikkikkut uatsinnit ikorfartorneqarnissaa pisariaqarpoq. Ilinniartitsisut, Ilinniarfissuaq, kommunit, angajoqqaat, atuartut, atuarfik allallut atuarfimmuut attuumassuteqartut ilisimassavaat, suliasarujussuatsinnut atatillugu uagut tapersersuinissarput naatsorsuutigisinnaagamikku. Politikki ullumikkumut naleqqiullugu meeqqat atuarfiannik pitsaanerusumik pilersitsiniarnitsinni naalleraasuusaanngilaq.

Taassuma saniatigut siunnersuutigaara, inuttut ataasiakkaatut immitsinnullu akisussaassuseqartutut misiginerput nukittorsassagipput. Immitsinnut piuumaffigerujussuurtariaqarpugut ajornartorsiutillu assigiinngitsut aaqiissutissaat allanit tunniunneqarnissaat naatsorsuutiginaq. Inuiaqatigiinni inooqataaffigisani ajornartorsiut takusinnaagaanni, aaqinneqarnissaanut ilapittuissalluni akisussaaffeqarpoq. Inuit amerlavallaarujussuurtut angerlarsimaffiminniiginnarput imaluunniit internetikkut inuit naapittarfiini naammangittaalliorusaarput, politikkimilu imaluunniit peqatigiiffinni peqataanatik. Innuttaasorpasuaqarpoq akuliunneq ajortunik pitsaasunik ilanngussisarlutillu isumassarsiaqartartunik. Kisianni inuiaqatigiit tunngaviusumik akuliunnikkut ataatsimooqatigiinnikkullu ingerlanneqartarput. Arlaannaalluunniimmi iliuuseqanngippat aamma arlaannaannilluunniit attuumassuseqarneqassanngilagut. Taamatut innera isumakulunnartutut isigaara, inuppassuit politikkimut akuliunnissaminnut nangaammata imaluunniit kikkut tamarmik tusarsinnaasaannik isummensorusunneq ajormata, arlaatigut uparuartorneqarnissartik annilaangatigisaramikku. Taamaattumik kikkut tamarmik tusaasinnaasaanik oqallinneq inuit aalajangersimasut kisimik saqqumiffigaat – inunnik nutaanik oqallinnermi peqataasussanik pisariaqartitsivugut. Innuttaasoqarpallu ilumoorlutik

kikkut tamaasa tusaatillugit kingunissaasa annilaangatiginerat pissutigalugu isummaminnik saqqummiussinissaminnut annilaangasunik – taava ajornartorsiuterujussuaqarpugut isumagisariaqakkatsinnik.

Alla taasariaqartoq tassaavoq nammineq kajumissuseq tunngavigalugu sulineq. Nukissagut naapertorlugit inuiaqatigiinnut utertitsinissarput nammineerluta immitsinnullu naatsorsuutigisariaqarparput. Isumaqarpunga tamatta sapaatip akunneranut nalunaaquttap akunneri marluk-pingasulluunniit inuiaqatigiinni ulluinnarni inooqataaffigisatsinni atorfinnagaluarpagut. Peqatigiiffinnut piusunut peqataasinnaavugut imaluunniit nammineerluta peqatigiiffiliorluta. Nammineq kajumissuseq tunngavigalugu allanut tunniussineq naleqassusermut tulluusimaarnermullu nukittorsaataasarput. Nukiillu nammineq kajumissusermiittut nunami matumani mianerisarialinnut isumalerujussuupput. Innuttaasut innuttaqatiminnut pulaartartut, siunnersuisartut imaluunniit meeqqanut inuusuttuaqqanullu naligiinnerunissaq ataatsimoornerunissarlu siunertaralugit pilersitsiniartut naligiinnerunermik ataatsimoornerunermillu pilersitseqataasarput.

Annertunerusumik naligiilernissarput angussagutsigu, tassaapput uanga naleqartitat Nunatsinni piviusussanut siunnersuutikka. Taamatut oqallinnissamut periarfissinneqarnitsinnut Inuit Ataqaatigiinnut qujanaq.